

## AMÔR DI PATRIE!

I americans si dan di maravee che in Italie, cun tancj bêçs e cun tante robe che lôr a àn mandade ca, si vebi fat cussì pôc par rimeti in sest la nazion. Si viôt che i americans no àn in mò capide une robe: che il talian al è salacor il popul che mancul al vûl ben ae sô patrie. Cu lis peraulis sì: "patrie, patrie!" ogni moment, e "Italie" simpri in bocje. E sbandieraments e prucissions e manifestazions e cjacaris parsore cjacaris. Ma e je dute une speculazion, e ognidun al cîr nome di tirâ il plui grant vantaç che al po, dal so patriotisim.

Intor de patrie ducj cîr nome di roseâ; lis risorsis de patrie ducj cîr nome di sfrutâlis tal so interès; cul guvier de patrie nissun si fâs scrupul di doprâ cualchi imbroi: camore gjenerâl inte burocrazie, camore intai partîts, camore inte industrie e mangjariis di ogni bande. I bêçs dai americans a son lâts intes sachetis dai talians plui svelts, ma no àn dreçade la Italie. Un altri popul al varès, salacor, fats meracui cun chei mieçs: un popul nudrît di serietât, di cussience civîl e sociâl, di rispiet aes leçs, di amôr pe justizie, di vêr spirt patriotic, in sumis, di chel spirt che al fâs diventâ grande e prosperose e rispietade une nazion.

Il talian al à roseât: cuarante millions di surîs o pantianis intor di un vues che si clame la "patrie"! La Italie e je une robe di mangjâ: par chei tancj di lôr che la àn simpri in bocje: chei tancj che, intun câs di vuere, a fasin i imboscâts o i autolesioniscj e passade la vuere a fasin il monument ai muarts. Diu lu vueli che i furlans a sedin simpri pôc "patriots"!

josef marchet - Patrie dal Friûl /1950